

## MEMORIA ECONÓMICA E XUSTIFICATIVA

**OBXECTO:** Convenio de cooperación entre a Xunta de Galicia, a través da Vicepresidencia Primeira e Consellería de Presidencia, Xustiza e Deportes, e o Concello de Crecente para a adecuación interior dos vestiarios da pista polideportiva de Filgueira.

**COMPETENCIA:** A Vicepresidencia Primeira e Consellería de Presidencia, Xustiza e Deportes, no exercicio das súas competencias e funcións, ten previsto na súa planificación de mellora das infraestruturas e dos equipamentos deportivos da Comunidade Autónoma de Galicia, actuacións que permitan a construción ou mellora de instalacións deportivas básicas ou daquelas que presenten un maior interese deportivo. A Lei orgánica 1/1981, do 6 de abril, do Estatuto de Autonomía de Galicia, no seu artigo 27. 22, sinala a competencia da Comunidade Autónoma de Galicia en materia de promoción do Deporte.

No exercicio da devandita competencia, o Parlamento de Galicia ditou a Lei 3/2012, do 2 de abril, do deporte de Galicia, que no artigo 4 dispón que “no ámbito das súas respectivas competencias, as administracións públicas galegas fomentarán a práctica do deporte conforme aos seguintes principios: j) A planificación e promoción dunha rede de instalacións deportivas que posibilite a xeneralización práctica da actividade deportiva”.

Pola súa parte, o artigo 9 establece que as competencias en materia de deporte das diferentes administracións públicas de Galicia exerceranse baixo os principios de cooperación, colaboración, coordinación e información multilateral.

E o artigo 6 establece que para o mellor exercicio das súas competencias, a Administración autonómica poderá subscribir convenios de colaboración coas demais administracións públicas e entidades públicas e privadas vinculadas á actividade deportiva.

O Decreto 117/2022, do 23 de xuño, polo que se establece a estrutura orgánica da Vicepresidencia Segunda e Consellería de Presidencia, Xustiza e Deportes, actualmente vixente en virtude da Disposición Transitoria do Decreto 59/2023, do 14 de xuño, polo que se establece a estrutura orgánica da Xunta de Galicia, atribúe á Secretaría Xeral para o Deporte a elaboración, proposta e execución da política do Goberno galego en materia de deportes e, en particular, a promoción e execución de infraestruturas de titularidade municipal mediante convenios de colaboración coas administracións locais.

A Lei 40/2015, do 1 de outubro, de Réxime Xurídico do Sector Público regula a colaboración interadministrativa entre dúas ou máis Administracións Públicas para un fin común.

A Lei 7/1985, do 2 de abril, reguladora das bases de réxime local, dispón no artigo 25.2.l) que os concellos exercerán en todo caso como competencias propias, nos termos da lexislación do Estado e das Comunidades Autónomas, entre outras materias as de promoción do deporte e instalacións deportivas.

No marco da lexislación básica do Estado, a Lei 5/1997, do 22 de xullo, de administración local de Galicia, establece que os concellos exercerán entre outras competencias as relativas a actividades e instalacións culturais e deportivas (artigo 80.2.n) e poderán



celebrar coa Xunta de Galicia convenios de cooperación para unha xestión máis eficaz das súas competencias (artigo 198).

**XUSTIFICACIÓN DO INSTRUMENTO CONVENCIONAL:** O fomento do deporte base e da actividade física son unhas das liñas de actuación prioritarias da Secretaría Xeral para o Deporte as cales reclaman unha mellor dotación das infraestruturas de libre acceso e mantemento alcanzable para poder chegar a todos os usuarios. En 2011 o Goberno autonómico aproba o Plan Galego para o Fomento da Actividade Física Saudable, que se articula e impulsa a través da Secretaría Xeral para o Deporte e a Fundación Deporte Galego, como oficina técnica do Plan. Este Plan ten como obxectivo prioritario crear as condicións para que a poboación galega goce dunha vida máis activa, que permita conservar a saúde e a autonomía persoal, gozar de maior benestar e calidade de vida, e previr e reducir a presenza de enfermidades relacionadas co sedentarismo, desde a infancia ata a vellez. Para conseguir estes obxectivos faise necesario unha mellor dotación das infraestruturas de libre acceso e mantemento alcanzable para poder chegar a todos os usuarios.

**OBXECTIVOS:** A finalidade do convenio é establecer as bases de actuación das partes asinantes, regular as obrigas que cada unha asume e establecer o marco xurídico-administrativo das súas intervencións.

Crecente é un pequeno concello da provincia de Pontevedra cunha poboación de 1.937 habitantes (segundo o IGE do 2022). Pertencente á comarca da Paradanta. O concello limita coa provincia de Ourense e con Portugal.

As marxes deste concello están bañadas polo Miño, o que crea extraordinarias paisaxes de contrastes dende o val ás montañas.

O Concello de Crecente conta cunha serie de clubs e asociacións deportivas. Equipos afeccionados e federados de diferentes disciplinas e modalidades deportivas que participan en competicións e ligas en categorías para nenos e senior.

O Concello de Crecente conta con diferentes instalacións municipais ao longo de todo o municipio, principalmente no núcleo urbano de Crecente, aínda que no resto de parroquias tamén conta con outras instalacións de menor entidade pero que ofrecen unhas instalacións deportivas aos veciños que as utilizan de forma asidua. A parroquia de Filgueira conta cunha pista polideportiva cuberta.

A realidade da comarca e as necesidades de servizos deportivos da súa poboación, requiren da correspondente actuación pública destinada á satisfacción e consecución destes intereses e da demanda existente.

O departamento municipal de Deportes do Concello de Crecente ten como misión promover e facilitar o acceso á práctica deportiva de tódolos cidadáns do concello.

Para levala a cabo, desenvolve as seguintes funcións: promovel a creación de instalacións deportivas, xestionar convenientemente as instalacións existentes, organizar e desenvolver eventos e espectáculos deportivos e xestionar a oferta deportiva municipal mediante a cesión de instalacións, abonados e actividades.



O concello de Crecente conta na parroquia de Filgueira conta cunha pista polideportiva cuberta que dispón de dous vestiarios nunha construción anexa á pista polideportiva.

A actuación proxectada consiste na adecuación dos vestiarios da pista polideportiva de Filgueira.

As actuacións previstas son as seguintes:

Demolición e picado manual das plaquetas que están rotas ou soltas e requiren da súa recolocación. Repoñer o alicatado.

Recebado e enlucido de toda a estancia de entrada.

Nos teitos retiraranse as molduras do perímetro e executarase un falso teito continuo de xeso laminado.

Todos os paramentos e teitos que non teña plaqueta pintaranse con pintura acrílica mate anti mofo. Inclúense partidas para limpeza final da obra, xestión de residuos, e seguridade e saúde.

Para a actuación a acometer foi redactada memoria valorada polo enxeñeiro técnico Diego Conde Rodríguez.

As administracións públicas asinantes deste convenio son conscientes de que o incremento e mellora das condicións que esixe a práctica deportiva reclama unha mellor dotación de infraestruturas, de forma que permitan dar satisfacción á crecente demanda social existente na materia.

#### ORZAMENTO ESTIMADO PARA O OBXECTO DO CONVENIO. EXISTENCIA DE CRÉDITO

O importe total das actuacións a realizar ao abeiro deste convenio ascende á cantidade de **oito mil novecentos noventa e oito euros con dous céntimos (8.998,02 €)**, IVE incluído. Os gastos do proxecto, dirección de obra, dirección de execución de obra, coordinación de seguridade e saúde correrán a cargo do Concello de Crecente.

A Vicepresidencia Primeira e Consellería de Presidencia, Xustiza e Deportes financiará ditas actuacións coa cantidade de **oito mil novecentos noventa e oito euros con dous céntimos (8.998,02 €)**, IVE incluído, con cargo á aplicación orzamentaria 06.02.441A.760.0 (código de proxecto 2013 00039) do seu orzamento de gastos para o exercicio 2023.

|                       |            |
|-----------------------|------------|
| Anualidade 2023 ..... | 8.998,02 € |
|-----------------------|------------|

O orzamento total segundo o **proxecto ascende a 8.998,02 € €** desagregado segundo o resumen que se reflicte a continuación:



**TÍTULO DO PROXECTO:**

Adecuación interior dos vestiarios da pista polideportiva de Filgueira

**LOCALIZACIÓN:**

Crecente. (Pontevedra)

**AUTOR:**

Diego Conde Rodríguez.

|                                     |                   |
|-------------------------------------|-------------------|
| <b>ORZAMENTO EXECUCIÓN MATERIAL</b> | <b>6.249,06 €</b> |
| GASTOS XERAIS – 13%                 | 812,38 €          |
| BENEFICIO INDUSTRIAL – 6%           | 374,94 €          |
| <b>SUMA</b>                         | <b>7.436,38 €</b> |
| IVE – 21%                           | 1.561,64 €        |
| <b>ORZAMENTO DE LICITACIÓN</b>      | <b>8.998,02 €</b> |

Todo isto, tratando de conxugar as dispoñibilidades orzamentarias coas actuacións necesarias para o desenvolvemento da práctica deportiva nas debidas condicións de operatividade e seguridade, tendo en conta ademais os principios de estabilidade orzamentaria e sustentabilidade financeira.

O prazo proposto para a execución do contrato, establécese en función das previsións de adxudicación da obra e a previsión da súa propia execución ( 1 mes segundo o plan de obra do proxecto). Facendo unha estimación do prazo para a sinatura do convenio dentro do mes de outubro, e segundo o previsto no plan de obra proposto polo Concello de Crecente, permitiría nesas datas o inicio do expediente de contratación e a estimación para a adxudicación no mes de outubro e, así, poder comenzar as obras no mes de outubro.

**Coherencia co Plan estratéxico de Galicia.**

Estímase que esta actuación é coherente co Plan Estratéxico de Galicia, correspondendose cos seus:

- EIXE 1. O RETO DEMOGRÁFICO
- PA 1.4 Fortalecer unha asistencia sanitaria accesible e de calidade
- OE 1.4.7 Impulsar o deporte dende a etapa escolar e como práctica integradora e inclusiva que conduza á súa xeneralización entre a poboación galega, fortalecendo o deporte feminino e atendendo aos deportistas de alto nivel durante e despois da



súa dedicación deportiva. Procura das condicións máis adecuadas que coadruen aos clubs e deportistas nas súas respectivas competicións deportivas dentro e fóra de Galicia.

Consultada a pantalla de indicadores de proxectos do sistema contable Xumco2, constátase que o indicador de seguimento vixente para o proxecto 2013 00039 “Subvencións para infraestruturas deportivas” é o PO1011 – Actuacións en infraestruturas e equipamentos deportivos cun valor previsto de:

•PO1011 – Actuacións en infraestruturas e equipamentos deportivos

30

Esta actuación sumada a convocatoria que se está a tramitar e outros posibles convenios que pola especificidade da actuación proceda asinar implicará que o valor deste indicador se cumpra.

A continuación, detállase a territorialización do gasto distribuído por provincias:

| Provincia  | Porcentaxe |
|------------|------------|
| A Coruña   | 30 %       |
| Lugo       | 20 %       |
| Ourense    | 20 %       |
| Pontevedra | 30 %       |

Por todo o exposto, estímase xustificada a utilización do instrumento do convenio para articular as actuacións de referencia que como se describiu anteriormente consiste na adecuación interior dos vestiarios da pista polideportiva de Filgueira (Crecente). Para a tramitación do convenio, tense observado o cumprimento dos requisitos establecidos na Lei 40/2015, do 1 de outubro, de réxime xurídico do sector público.

Santiago de Compostela, na data da sinatura electrónica

O secretario xeral para o Deporte

José Ramón Lete Lasa

